



Syi'ah Imamiyyah Ithna 'Asyariyyah: Satu Pengenalan Ringkas

Ajaran Syi'ah pada hakikatnya adalah merupakan ciptaan musuh-musuh Islam yang terdiri daripada Yahudi, Nasrani dan Majusi. Untuk mengetahui lebih lanjut lagi tentang kelahiran Syi'ah ini marilah kita merenung sejenak sejarah silam zaman Khalifah ketiga umat Islam iaitu Khalifah Uthman bin Affan r.a.

Zaman permulaan Islam iaitu zaman Khulafaa' ar-Rasyidun, Islam begitu kuat sehingga tidak mampu diganggu gugat oleh musuh secara berdepan. Sehingga dua kuasa besar pada ketika itu iaitu kerajaan Rom dan Farsi terpaksa tunduk kepada kekuasaan kerajaan Islam. Kerana itu pada zaman Sayyidina Umar r.a. lagi sudah bermula pakatan musuh Islam untuk menghancurkan kekuasaan

Islam. Antara perancangan yang dilakukan mereka ialah peristiwa pembunuhan khalifah Umar r.a.

Seterusnya pada zaman Sayyidina Uthman r.a. musuh-musuh Islam ini masih lagi tidak mampu untuk menghadapi umat Islam secara terbuka dengan senjata. Lantas mereka membuat perancangan untuk menghancurkan Islam dari dalam. Hasilnya muncullah seorang yang bernama Abdullah Ibnu Saba' yang berpura-pura memeluk Islam dengan matlamat untuk menghancurkan Islam dari dalam. Taktik yang digunakan oleh Ibnu Saba' adalah dengan memecah-belahkan kesatuan umat Islam. Antaranya dengan menyebarkan ajaran yang bukan berasal dari Islam tetapi atas nama Islam.

Ajaran Ibnu Saba' yang kemudiannya diterima oleh golongan Syi'ah sebenarnya berasal dari Yahudi, Nasrani dan Majusi. Di zaman Sayyidina Uthman r.a. Ibnu Saba' telah berjaya menaburkan racunnya kepada golongan-golongan yang baru memeluk agama Islam, tidak kuat keislamannya serta berada jauh dari kelompok sahabat-sahabat r.a.

Namun begitu golongan Syi'ah cuba untuk menafikan kewujudan Ibnu Saba'. Mereka mengatakan ianya adalah manusia khayalan yang direka-reka kewujudannya oleh golongan yang memusuhi Syi'ah. Tetapi kitab-kitab sejarah samaada dari kalangan Ahl as-Sunnah wa al-Jamaah atau

Syi'ah menolak penafian mereka dan membuktikan dengan jelas tentang kewujudan Ibnu Saba'.

Antaranya Ikhtiyaru Ma'rifah ar-Rijal yang lebih dikenali dengan Rijal Al-Kasysyi iaitu kitab rijal yang paling utama di sisi Syi'ah telah menukilkan satu riwayat daripada Imam Ja'far As-Sadiq yang berbunyi:

عن ابن سنان، قال، قال أبو عبد الله عليه السلام: أنا أهل بيت صادقون، لانخلو من كذاب يكذب علينا، فيسقط صدقنا بكذبه علينا عند الناس، كان رسول الله صلى الله عليه وآله أصدق البرية لهجة، وكان مسيلمة يكذب عليه. وكان أمير المؤمنين عليه السلام أصدق من برأ الله من بعد رسول الله صلى الله عليه وآله، وكان الذي يكذب عليه ويعمل في تكذيب صدقه بما يفتري عليه من الكذب عبد الله بن سبا لعنه الله

Daripada Ibnu Sinan katanya: Abu Abdillah a.s. berkata: "Sesungguhnya kami Ahl al-Bait adalah orang-orang yang benar, kami tidak sunyi daripada pendusta-pendusta yang berdusta atas nama kami lalu gugurlah kebenaran kami di sisi manusia disebabkan oleh pendustaan yang dilakukan atas nama kami. Nabi s.a.w. adalah orang yang paling benar ucapannya dan Musailamah telah berdusta atas namanya. Amirul mukminin (Ali) a.s. adalah orang yang paling benar diciptakan oleh Allah selepas Rasulullah s.a.w. dan orang yang berdusta atas namanya serta berusaha dalam mendustakan kebenarannya dengan mengadakan dusta atas nama beliau adalah Abdullah bin Saba' semoga Allah melaknatnya".¹


Di antara tokoh-tokoh Syi'ah yang lain yang menyebutkan perkara sama ialah an-Naubakhti dalam "Firqah asy-Syi'ah" (hal: 43-44), al-Hulli dalam "Kitab al-Rijal" (hal: 469), Mamaqami seorang tokoh ulama' Rijal Syi'ah mutaakhir di dalam kitabnya "Tanqihu al-Maqal" (Jilid 2 hal: 184), al-Ustarabadi dalam kitab "Manhaju al-Maqal" (hal: 203), Ibnu Abi al-Hadid dalam "Syarah Nahju al-Balaghah" (Jilid 2 hal: 309), Syeikh Abbas al-Qummi dalam kitabnya "Tuhfatu al-Ahbab" (hal: 184) dan lain-lain.

Di kalangan tokoh ahli Sunnah yang menyebutkan berkenaan ajaran Ibnu Saba' ini dan peranannya dalam

¹ Abu Ja'far Muhammad bin Al-Hasan Bin Ali At-Thusi *Ikhtiyaru Ma'rifah ar-Rijal* juz 4 hal 305

memecahbelahkan umat Islam ialah Abu Hasan al-Asyaari dalam “Maqalat al-Islamiyin” (Jilid 1 hal:50), Abdul Qahir al-Baghdadi dalam “al-Farqu Baina al-Firaq” (hal: 233-235), al-Isfiraini dalam “at-Tabsir fi ad-Din” (hal: 108-109), as-Syahrastani dalam “al-Milal wa an-Nihal” (Jilid 2 hal: 11), at-Thabari dalam “Tarikh al-Umam wa al-Muluk” (Jilid 5 hal 90), Ibnu Kathir dalam “al-Bidayah wa an-Nihayah” (Jilid 7 Hal: 167), Hafiz Ibnu Hajar dalam “Lisan al-Mizan” (Jilid 3 hal: 289), Yaqut Al-Hamawi dalam Mu'jam al-Buldan (Jilid 2 hal. 306) dan lain-lain.

Ajaran Syi'ah yang bercanggah dengan ajaran Islam.



1. Aqidah al-Imamah dan al-Walayah

Iaitu kepercayaan bahawa Imam Dua Belas yang diimani oleh mereka dilantik berdasarkan nas dari pihak Allah dan mereka adalah maksum terpelihara dari dosa kecil dan besar serta dari lupa dan lalai. Imam-imam tersebut ialah:

1. Ali bin Abi Talib (wafat 40 H)
2. Hasan bin `Ali (wafat 50 H)
3. Husain bin `Ali (wafat 61 H)
4. `Ali Zainal `Abidin bin Husain (wafat 94 H)
5. Muhammad al-Baqir bin Ali Zainal Abidin (wafat 117 H)
6. Ja`far as-Sadiq bin Muhammad al-Baqir (wafat 148 H)
7. Musa al-Kazim bin Ja`far as-Sadiq (wafat 183 H)
8. `Ali ar-Ridha bin Musa Kazim (wafat 202 H)
9. Muhammad al-Jawaad bin `Ali ar-Ridha (wafat 220 H)
10. `Ali bin Muhammad al-Jawaad (wafat 254 H)
11. Hasan bin `Ali al-`Askari (wafat 260 H)
12. Muhamad bin Hasan al-Askari al-Mahdi (ghaib 260 H)

Kepercayaan ini begitu penting di dalam ajaran Syi'ah, sehingga ia merupakan salah satu syarat keimanan dan dianggap sebagai rukun Islam yang paling penting. Setiap Nabi yang datang telah mengakui keimanan dan walayah Ali dan seseorang yang tidak mengenal imam-imamnya dianggap tidak mengenal Allah. Kepercayaan ini terdapat

dalam pelbagai kitab Syi'ah terutamanya kitab al-Kafi. Antaranya:

عن فضيل بن يسار، عن أبي جعفر عليه السلام قال: بني الاسلام على خمس: على الصلاة والزكاة والصوم والحج والولاية ولم يناد بشئ كما نودي بالولاية، فأخذ الناس بأربع وتركوا هذه يعني الولاية.

Al-Kulaini meriwayatkan dari Fudhail dari Abi Jaafar a.s. Kata beliau: “Islam ditegakkan di atas lima perkara; sembahyang, zakat, puasa, haji dan walayah. Tidak ada satu pun daripada rukun-rukun yang tersebut yang diseru sebagaimana seruan yang diberikan kepada al-Walayah. Lalu manusia mengambil keempat-empatnya dan meninggalkan yang ini, iaitu walayah.”²

1.1- Ciri-ciri kepercayaan kepada al-walayah:

1.1.1- Imam-imam wajib ditaati, maksum dan diberikan sokongan:

² Muhammad bin Yaakob al-Kulaini *Al-Usul Min al-Kafi* – jil. 2 hal. 20

عن عبدالله بن سنان، عن إسماعيل بن جابر، قال: قلت لابي جعفر عليه السلام: أعرض عليك ديني الذي أدين الله عزوجل به؟ قال: فقال: هات قال. فقلت: أشهد أن لا إله إلا الله وحده لا شريك له وأن محمدا عبده ورسوله والاقرار بما جاء به من عند الله وأن عليا كان إماما فرض الله طاعته، ثم كان بعده الحسن إماما فرض الله طاعته، ثم كان بعده الحسين إماما فرض الله طاعته، ثم كان علي بن الحسين إماما فرض الله طاعته حتى انتهى الامر إليه، ثم قلت: أنت يرحمك الله؟ قال: فقال: هذا دين الله ودين ملائكته.

Daripada Abdullah bin Sinan daripada Ismail bin Jabir katanya: “Saya berkata kepada Abi Ja’far (Muhammad al-Baqir) a.s.: “Bolehkan saya kemukakan kepadamu agamaku yang Allah telah tetapkannya sebagai agama? Dia (Ismail) berkata: “Lalu diapun (Abu Ja’far) berkata: “Silakan”. Saya

pun berkata: “Aku bersaksi bahawa tiada tuhan melainkan Allah yang esa yang tiada sekutu baginya dan Muhammad adalah hamba-Nya dan rasul-Nya dan berikrar terhadap segala yang dibawa olehnya dari sisi Allah. Sesungguhnya Ali adalah imam yang Allah fardhukan supaya ditaati. Kemudian selepasnya Hasan sebagai imam yang difardhukan oleh Allah untuk ditaati, kemudian selepasnya Husain sebagai imam yang Allah fardhukan untuk ditaati. Kemudian selepasnya Ali bin al-Husain sebagai imam yang Allah fardhukan untuk ditaati sehingga urusan tersebut berakhir kepadanya”. Kemudian aku (Ismail) berkata: “Engkau juga! Semoga Allah merahmatimu”. Dia (Ismail) berkata: “Lalu dia (Abu Abdillah) berkata: “Ini adalah agama Allah dan agama malaikat-malaikatnya”.³

1.1.2- Imam-imam memiliki dunia dan akhirat:

عن أبي بصير، عن أبي عبد الله عليه السلام قال أما علمت أن الدنيا والآخرة للامام يضعها حيث يشاء ويدفعها إلى من يشاء، جائز له ذلك من الله

Abu Abdillah a.s. berkata, “Tidakkah engkau (Abu Basir) tahu bahawa sesungguhnya dunia dan akhirat adalah kepunyaan Imam. Dia boleh meletakkannya di mana

³ Muhammad bin Yaakob al-Kulaini *Al-Usul Min al-Kafi* jil. 1 hal. 188

dikehendaki dan memberikan kepada sesiapa yang dikehendakinya. Itu adalah satu kebenaran dari pihak Allah kepadanya”.⁴

Berdasarkan kepada riwayat ini jelas Syi'ah telah melakukan perbuatan mensyirikkan Allah ta'ala dengan memberikan hak menguasai dunia dan akhirat kepada imam-imam mereka sedangkan ianya adalah hak Allah ta'ala.

1.1.3- Imam-imam mengetahui perkara ghaib:

سمعوا أبا عبد الله عليه السلام
يقول: إني لأعلم ما في
السموات وما في الأرض وأعلم
ما في الجنة وأعلم ما في
النار، وأعلم ما كان وما
يكون، قال: ثم مكث هنيئة فرأى
أن ذلك كبر على من سمعه منه
فقال: عدت ذلك من كتاب الله
عز وجل

Mereka (perawi-perawi) mendengar Aba ‘Abdillah a.s. berkata: “Sesungguhnya aku mengetahui apa yang ada di langit-langit dan bumi dan aku mengetahui apa yang

⁴ Muhammad bin Yaakob al-Kulaini *Al-Usul Min al-Kafi* jil. 1 hal. 409 Bab Dunia Ini Semuanya Kepunyaan Imam

terdapat di dalam syurga serta apa yang terdapat di dalam neraka dan aku mengetahui segala yang telah berlaku dan akan berlaku”. Perawi berkata: “Kemudian dia diam seketika lalu mendapati perkara tersebut berat kepada orang yang mendengarnya lalu ia berkata: “Aku mengetahui perkara tersebut daripada kitab Allah ‘azzawajalla”.⁵

1.1.4- Imam-imam kekal dan tidak binasa:

عن أبي عبد الله عليه السلام في
قول الله عز وجل: كل شيء هالك إلا
وجهه قال: نحن.

Daripada Abu Abdillah (Jaa’far as-Sadiq) berkenaan firman Allah: “Segala sesuatu akan binasa kecuali wajahnya” beliau berkata: “Kamilah (wajah Allah itu)”.⁶

Syi’ah telah mensyirikkan Allah ta’ala dengan memberikan sifat Allah (tidak binasa) kepada imam-imam mereka berdasarkan kepada riwayat tersebut.

⁵ Muhammad bin Yaakob al-Kulaini *Al-Usul Min al-Kafi* jil. 1 hal 262

⁶ Syeikh Saqud At-Tauhid Bab Tafsir Firman Allah Taala ‘Segala Perkara Akan Binasa Kecuali Wajahnya hal 151, *Tafsir Maqbul Ahmad*

1.1.5- Dari sudut kenabian Syi'ah mengatakan bahawa imam-imam mereka memiliki sifat-sifat kenabian bahkan lebih tinggi dari nabi-nabi dan para malaikat. Akidah ini akan meruntuhkan akidah Nabi Muhammad s.a.w. adalah penyudah sekalian nabi. Khomeini menyebutkan di dalam kitabnya:

ان للامام مقام ما محمودا لا
يبلغه ملك مقرب ولا نبي مرسل.

Bermaksud: "Sesungguhnya imam itu mempunyai kedudukan yang terpuji yang tidak sampai kepadanya malaikat yang hampir kepada Allah dan nabi lagi rasul".⁷

2. Aqidah Takfir as-Sahabah (Aqidah Mengkafirkan Sahabat).

Iaitu akidah tentang majoriti para sahabat telah murtad sepeninggalan Nabi Muhammad s.a.w.. Akidah ini tidak tersembunyi kepada sesiapa sahaja yang pernah membaca kitab-kitab Syi'ah. Bolehlah dikatakan tidak ada walaupun sebuah kitab Syi'ah yang muktabar terutamanya yang ditulis oleh ulama' mutaqaaddimin mereka melainkan pasti tersebut di dalamnya riwayat-riwayat yang mengkafirkan atau memurtadkan para sahabat atau melaknat, memaki hamun dan melakukan tabarra (yakni menyatakan sikap berlepas

⁷ Khomeini *al-Hukumah al-Islamiah* – hal 52

diri dan tidak mempunyai hubungan kasih sayang) terhadap mereka. Tidak terlepas daripada tuduhan-tuduhan tersebut sahabat-sahabat utama Rasullullah s.a.w seperti Sayyidina Abu Bakar, Umar, Uthman, Abdul Rahman bin 'Auf, isteri-isteri Rasullullah s.a.w dan lain-lain.

Antara hadith Syi'ah yang menyebutkan perkara tersebut ialah:

عن أبي جعفر (ع) قال : كان
الناس أهل ردة بعد النبي صلى
الله عليه وآله إلا ثلاثة فقلت:
ومن الثلاثة؟ فقال : المقداد بن
الأسود وأبو ذر الغفاري و
سلمان الفارسي رحمة الله وبركاته
عليهم

Daripada Abu Ja'far a.s. katanya: “Manusia telah murtad sepeninggalan Nabi s.a.w. kecuali tiga orang”. Saya (perawi) bertanya: “Siapakah tiga orang itu? Beliau menjawab: “Miqdad bin al-Aswad, Abu Zarr al-Ghifari dan Salman al-Farisi rahmatullah alaihim”.⁸

⁸ Muhammad bin Yaakob al-Kulaini *Ar-Raudhah Min al-Kafi* jil. 8 hal. 245, Mulla Baqir al-Majlisi *Bihar al-Anwar* 22/333

Bahkan mereka meriwayatkan bahawa imam Ja'far As-Sadiq menjadikan laknat beberapa orang sahabat sebagai wirid selepas sembahyangnya:

عَنِ الْحُسَيْنِ بْنِ ثُوَيْرٍ وَ أَبِي سَلَمَةَ
السَّرَّاجِ قَالَا سَمِعْنَا أَبَا عَبْدِ اللَّهِ
(ع) وَ هُوَ يَلْعَنُ فِي دُبُرِ كُلِّ
مَكْتُوبَةٍ أَرْبَعَةَ مِنَ الرِّجَالِ وَ
أَرْبَعًا مِنَ النِّسَاءِ فُلَانٌ وَ فُلَانٌ وَ
فُلَانٌ وَ مُعَاوِيَةَ وَ يُسَمِّيهِمْ وَ فُلَانَةَ
وَ فُلَانَةَ وَ هِنْدُ وَ أُمُّ الْحَكَمِ أُخْتُ
مُعَاوِيَةَ

Daripada Husain dan Abi Salamah katanya: “Kami mendengar Abu Abdillah a.s. melaknat selepas setiap sembahyang fardhu empat orang lelaki dan empat orang perempuan iaitu si-fulan, si-fulan, si-fulan dan Mu'awiyah serta ia menyebut nama mereka dan si-fulanah, si-fulanah, Hindun dan Ummul Hakam saudara perempuan Mu'awiyah”.⁹

Yang dimaksudkan dengan "si-fulan" di dalam kitab-kitab Syi'ah adalah yang pertama Abu Bakar r.a., kedua Umar r.a.

⁹ Muhammad bin Yaakob al-Kulaini *Al-Furu' Min al-Kafi* jil. 3 hal. 343

dan ketiga Uthman r.a. sementara "si-fulanah" adalah yang pertama Aisyah r.a. dan kedua Hafsa r.a.

3. Aqidah ar-Raj'ah

Iaitu salah satu aqidah Syi'ah yang jelas bercanggah dengan ajaran Islam iaitu kepercayaan tentang kebangkitan para Imam sebelum qiamat untuk menuntut bela atau menghukum orang-orang zalim yang telah merampas hak-hak mereka. Kepercayaan ini merupakan perkara yang telah diijmakkan oleh para ulama' Syi'ah. Antaranya:

"واتفتت الإمامية على وجوب
رجعة كثير من الأموات"

Bermaksud: "Golongan Imamah sependapat tentang wajibnya raj'ah (kembali) sebahagian besar dari orang-orang mati ke dunia sebelum qiamat".¹⁰

4. Tahrif al-Quran.¹¹

Iaitu kepercayaan bahawa al-Quran yang ada di tangan umat Islam kini sudah berlaku tokok tambah, pengurangan, penambahan dan penyelewengan. Akidah ini

¹⁰ Syekh Mufid *Awaail al-Maqaalat* hal. 52

¹¹ Perbincangan tentang tahrif al-Quran secara lebih terperinci terdapat di dalam artikel ketiga buku ini.

merupakan satu akidah yang sangat penting di sisi Syi'ah sehingga ulama' mereka menganggap ianya adalah merupakan dharuriat (perkara yang diketahui dengan mudah) di dalam ajaran Syi'ah. Antara yang menyebutkan sedemikian ialah seorang ulama' tafsir terkemuka Syi'ah Sayyid Hashim al-Bahrani di dalam kitabnya Tafsir al-Burhan.

Di antara ulama' Syi'ah yang mengakui berlakunya tahrif kepada al-Quran adalah Allamah Husain bin Muhammad Taqiy an-Nuuri at-Thabarsi. Beliau telah menukulkan kata-kata Sayyid Ni'matullah al-Jazaairi di dalam kitabnya Al-Anwar An-Nu'maniyyah yang berbunyi:

أن الأصحاب قد أطبقوا على صحة
الأخبار المستفيضة
المتواترة الدالة بصريحها على
وقوع التحريف في القرآن

Bermaksud: "Sesungguhnya tokoh-tokoh Syi'ah telah sepakat tentang sahnya hadits-hadits yang sampai ke peringkat mutawaatir yang menunjukkan dengan jelas tentang berlakunya penyelewengan terhadap al-Quran."¹²

¹² Allamah Husain bin Muhammad Taqiy an-Nuuri at-Thabarsi *Fashl al-Khitab Fi Ithbati Tahrif Kitabi Rab al-Arbab* hal. 31

Kitab-kitab utama Syi'ah juga tidak sunyi daripada mengemukakan riwayat-riwayat daripada imam-imam maksum mereka berkenaan aqidah ini. Antaranya:

عن جابر قال: سمعت أبا جعفر عليه السلام يقول: ما ادعى أحد من الناس أنه جمع القرآن كله كما أنزل إلا كذاب، وما جمعه وحفظه كما نزله الله تعالى إلا علي بن أبي طالب عليه السلام والائمة من بعده عليهم السلام

Bermaksud: Daripada Jabir katanya, aku mendengar Abu Ja'far a.s. berkata: “Tidaklah seseorang itu mendakwa bahawa ia telah mengumpulkan al-Quran kesemuanya sebagaimana diturunkan melainkan ia adalah seorang pendusta, al-Quran tidak dihimpunkan dan dihafal sebagaimana diturunkan oleh Allah Ta'ala kecuali Ali bin Abi Talib a.s. dan imam-imam selepasnya a.s.”¹³

5. Al-Bada'

Bada' bermakna:

¹³ Muhammad bin Yaakob al-Kulaini *Al-Usul Min al-Kafi* jil. 1 hal. 228

1. Nyata atau jelas sesuatu setelah tersembunyi seperti yang terpakai dalam firman Allah yang berbunyi:-

وَبَدَا لَهُمْ مِنَ اللَّهِ مَا لَمْ يَكُونُوا
يَحْتَسِبُونَ

“Dan jelaslah bagi mereka azab dari Allah yang tidak pernah terfikir oleh mereka”.¹⁴

2. Timbul fikiran baru tentang sesuatu setelah melihat keadaan yang berlainan dari apa yang ada dalam pengetahuan seseorang sebelumnya. Ini terpakai dalam firman Allah yang berbunyi:

ثُمَّ بَدَا لَهُمْ مِنْ بَعْدِ مَا رَأَوْا
الْآيَاتِ لَيْسَجُنُّهُ حَتَّىٰ حِينٍ

Kemudian timbul fikiran pada mereka setelah melihat tanda-tanda (kebenaran Yusuf) bahawa mereka mesti memenjarakannya hingga ke suatu masa.¹⁵

Kesimpulannya Bada' bererti jahil tidak mempunyai ilmu yang meliputi. Golongan Syi'ah mempercayai Allah bersifat dengan sifat al-Bada'.

¹⁴ Surah Az-Zumar Ayat 47

¹⁵ Surah Yusuf ayat 35

Di dalam al-Kafi terdapat satu riwayat yang dikemukakan oleh al-Kulaini dari ar-Rayyan Bin as-Salt, dia berkata: “Aku mendengar ar-Ridha a.s berkata: “Tidak ada seorang pun nabi yang diutus Allah melainkan ia membawa ajaran tentang haramnya arak dan ajaran yang memperakui Allah bersifat dengan al-Bada””.¹⁶

Hakikat Bada' ini dihuraikan oleh satu riwayat lain dengan lebih jelas lagi, iaitu riwayat yang dikemukakan oleh al-Kulaini juga dari Abi Hasyim al-Ja'afari katanya: “Pernah aku berada di samping Abi al-Hassan a.s. sepeninggalan anaknya Abu Ja'afar. Ketika itu aku berfikir di dalam diriku dan mahu menceritakan kepadanya apa yang terlintas di hatiku. Seolah-olah Abu Ja'afar dan Abu Muhammad dalam keadaan ini seperti Abu al-Hassan bin Musa dan Ismail bin Ja'afar bin Muhammad. Kisah kedua-duanya sama kerana Abu Muhammad yang diharapkan (menjadi Imam sepeninggalan Abu Ja'afar). Tiba-tiba Abu al-Hassan menghadap ke arahku sebelum lagi aku menceritakan isi hatiku kepadanya, terus dia berkata: “Ya, Wahai Abu Hasyim memang telah berlaku kepada Allah berhubung dengan Abu Muhammad sepeninggalan Abu Ja'afar apa yang Ia (Allah) tidak mengetahui sebelumnya seperti mana telah berlaku kepada Allah tentang Musa sepeninggalan Ismail. Perkara ini memang seperti apa yang terlintas di hatimu walaupun tidak disenangi oleh orang-orang yang sesat. Abu Musa adalah anakku yang menjadi pengganti

¹⁶ Muhammad bin Yaakob al-Kulaini *Al-Usul Min al-Kafi* jil. 1 hal.148

sesudahku kerana padanya ada pengetahuan yang diperlukan dan bersamanya ada alat Imamah”.¹⁷

An-Naubakhti menyebutkan bahawa Ja’afar bin Muhammad al-Baqir telah menentukan anaknya Ismail sebagai Imam sesudahnya dan beliau telah mengisyaratkan kepadanya semasa hidup lagi, tiba-tiba Ismail mati ketika beliau masih hidup. Maka Ja’afar pun berkata: “Tidak pernah berlaku kepada Allah (al-Bada’) berhubung dengan sesuatu seperti mana berlaku kepadanya berhubung dengan Ismail anakku”.¹⁸

5. Kahwin mut'ah.



Satu bentuk perkahwinan yang tidak memerlukan tanggungjawab, nafkah, pusaka dan perkara-perkara lain yang berkaitan dengan perkahwinan yang berkekalan.

¹⁷ Muhammad bin Yaakob al-Kulaini *Al-Usul Min al-Kafi* jil. 1 hal. 327

¹⁸ An-Naubakhti *Firaq as-Syi'ah* hal. 84

Perkahwinan yang semata-mata berlandaskan nafsu dan untuk berseronok. Di samping itu ia berdasarkan kontrak tempoh yang ditetapkan. Hakikatnya ia adalah perzinaan di atas nama Islam.

Ciri-ciri perkahwinan mut'ah.

1- Tidak mempunyai had bilangan tertentu:

عن محمد بن مسلم، عن أبي جعفر
(ع في المتعة قال: ليست من
الاربع لانها لاتطلق ولا ترث وإنما
هي مستأجرة

Daripada Muhammad bin Muslim daripada Abu Ja'far a.s. berkenaan mut'ah katanya: “Mereka-mereka itu (perempuan) bukan dari kalangan empat isteri kerana mereka tidak diceraikan dan tidak mewarisi. Mereka hanyalah perempuan sewaan”.¹⁹

2- Syarat mut'ah:

عن زرارة، عن أبي عبدالله قال: لا
تكون متعة إلا بأمرين أجل مسمى
وأجر مسمى

¹⁹ Muhammad bin Yaakob al-Kulaini *Al-Furu' Min al-Kafi* jil 5 hal 284

Daripada Zurarah daripada Abu Abdillah a.s. katanya: “Tidak berlaku mut'ah kecuali dengan dua perkara iaitu tempoh yang ditentukan dan mahar yang ditentukan”.²⁰

3- Mahar yang ditentukan:

عن الاحول قال: قلت لابي عبدالله
(ع: أدنى ما يتزوج به المتعة؟
قال: كف من بر

Daripada Ahwal katanya: aku berkata kepada Abi Abdillah a.s.: “Berapakah mahar yang paling sedikit untuk perkahwinan mut'ah? Lalu dia menjawab: “Segenggam gandum”.²¹

4- Tempoh masa mut'ah:

محمد، عن أحمد بن محمد، عن
محمد بن خالد، عن خلف بن حماد
قال: أرسلت إلى أبي الحسن (ع:
كم أدنى أجل المتعة؟ هل يجوز
أن يتمتع الرجل بشرط مرة
واحدة؟ قال: نعم

²⁰ Muhammad bin Yaakob al-Kulaini *Al-Furu' Min al-Kafi* jil 5 hal 286

²¹ Muhammad bin Yaakob al-Kulaini *Al-Furu' Min al-Kafi* jil 5 hal 286

Daripada Khalaf bin Hammad katanya: “Aku mengutuskan orang kepada Abil Hasan a.s. (supaya bertanya): “Berapakan tempoh paling singkat untuk melakukan mut’ah, adakah harus seseorang bermut’ah dengan syarat (persetubuhan) sekali sahaja? Ia menjawab: “Ya”.²²

6. Taqiyyah.

Menyembunyikan sesuatu yang terdapat dalam hati dan menyatakan yang sebaliknya. Dalam ertikata yang mudah ianya adalah berbohong yang atasnama Islam. Ajaran ini adalah merupakan ajaran yang sangat penting dalam ajaran Syi’ah sehingga sembilan persepuluh dari ajaran Syi’ah terletak pada taqiyyah²³ dan ia merupakan satu senjata yang sangat ampuh bagi ajaran ini.

6.1- Hakikat taqiyyah:

6.1.1- Kemuliaan dengan bertaqiyyah:

قال أبو عبد الله عليه السلام : يا
معلی اکتّم أمرنا ولا تذعه ، فإنه
من کتم أمرنا ولم یذعه أعزه الله
به في الدنيا وجعله نورا بين

²² Muhammad bin Yaakob al-Kulaini *Al-Furu' Min al-Kafi* jil. 5 hal 291

²³ Muhammad bin Yaakob al-Kulaini *Al-Usul Min al-Kafi* jil.2 hal 217

عِزِّيهِ فِي الْآخِرَةِ، يَقُودُهُ إِلَى
الْجَنَّةِ، يَا مَعْلَى مِنْ أَدَاعِ أَمْرِنَا
وَلَمْ يَكْتُمِهِ أَذْلَهُ اللَّهُ بِهِ فِي
الدُّنْيَا وَنَزَعَ النُّورَ مِنْ بَيْنِ
عِزِّيهِ فِي الْآخِرَةِ وَجَعَلَهُ ظَلَمَةً
تَقُودُهُ إِلَى النَّارِ، يَا مَعْلَى إِنَّ
التَّقِيَّةَ مِنْ دِينِي وَدِينِ آبَائِي
وَلَادِينِ لِمَنْ لَاتَقِيَّةَ لَهُ

Abu Abdillah a.s. berkata: “Wahai Mu'alla! Sembunyikan urusan (agama) kami dan jangan nyatakannya, kerana sesungguhnya orang yang menyembunyikan agama kami dan tidak menyatakannya akan dimuliakan oleh Allah di dunia dan Allah akan menjadikannya sebagai cahaya di antara dua matanya di akhirat yang akan membawanya ke syurga. Wahai Mu'alla! Orang yang menyatakan agama kami dan tidak menyembunyikannya akan di hina oleh Allah di dunia dan Allah akan membuang cahaya di antara dua matanya di akhirat dan akan menjadikannya kegelapan yang mengheretnya ke neraka. Wahai Mu'alla! Sesungguhnya taqiyah adalah agamaku dan agama datuk nenekku dan tidak ada agama bagi orang yang tidak bertaqiyah”.²⁴

²⁴ Muhammad bin Yaakob al-Kulaini *Al-Usul Min al-Kafi* jil. 2 hal 225

6.1.2- Sesama Syi'ah juga bertaqiyyah:

عن مسعدة ابن صدقة، عن أبي
عبدالله عليه السلام قال: ذكرت
التقية يوما عند علي بن
الحسين عليهما السلام فقال:
والله لو علم أبوذر ما في قلب
سلمان لقتله

Daripada Mas'adah daripada Abu Abdillah a.s. katanya:
“Pada suatu hari disebutkan taqiyyah dekat Ali bin Al-
Husain a.s. lalu dia berkata: “Demi Allah kalaulah Abu Zar
mengetahui apa yang terdapat di dalam hati Salman tentu
dia akan membunuh Salman”.²⁵

Di dalam kitab rijal yang tertua di sisi Syi'ah pengarangnya
mengemukakan riwayat yang kononnya daripada
Rasulullah s.a.w. yang berbunyi:

عن أبي بصير، قال سمعت أبا
عبدالله عليه السلام يقول: قال
رسول الله صلى الله عليه وآله:
يا سلمان لو عرض علمك علي

²⁵ Muhammad bin Yaakob al-Kulaini *Al-Usul Min al-Kafi* jil. 1 hal 402

مقداد لكفر، يا مقداد لو عرض
علمك على سلمان لكفر.

Daripada Abu Basir katanya: aku mendengar Abu Abdillah a.s. berkata: Rasulullah s.a.w. bersabda: “Wahai Salman! Kalaulah dikemukakan ilmumu kepada Miqdad pasti Miqdad akan menjadi kufur. Wahai Miqdad! Kalaulah dikemukakan ilmumu kepada Salman pasti Salman akan menjadi kufur”.²⁶

Di sisi Syi'ah Salman dan Abu Zar termasuk dari kalangan Syi'ah dan termasuk dalam kalangan beberapa kerat sahabat yang tidak murtad. Namun begitu antara keduanya masing-masing menyembunyikan pegangan sehingga hakikatnya masing-masing tidak mempercayai pihak yang satu lagi.

6.1.3- Tidak bertaqiyah bererti membunuh imam-imam:

يونس بن يعقوب، عن بعض
أصحابه، عن أبي عبدالله عليه
السلام قال: ما قتلنا من أذاع
حديثنا قتل خطأ ولكن قتلنا
قتل عمد.

²⁶ Abu Ja'far at-Thusi *Rijal al-Kasyi* jil. 1 hal. 48

Daripada Yunus bin Yaa'kub daripada sebahagian sahabat-sahabatnya dari Abi Abdillah a.s. katanya: "Orang yang menyatakan hadis kami tidak membunuh kami secara tersilap tetapi dia telah membunuh kami secara sengaja".²⁷

Empat riwayat di atas sudah cukup untuk menjelaskan hakikat taqiyyah di dalam ajaran Syi'ah. Kerana senjata taqiyyah inilah ajaran Syi'ah dapat menyelinap masuk dalam masyarakat Ahl as-Sunnah wa al-Jamaah dan seterusnya memperdaya mereka. Akhirnya dalam keadaan tidak sedar golongan Ahl as-Sunnah wa al-Jamaah satu demi satu berjaya di Syi'ahkan dan boleh menerima segala ajaran-ajaran yang tidak masuk akal di dalam ajaran Syi'ah.

6.2- Contoh taqiyyah:

وروي " أن العلة في ذلك أن الله تعالى فرض على الناس خمس صلوات فجعل من كل صلاة فريضة للميت تكبيرة ". ومن صلى على المرأة وقف عند صدرها، وليس في الصلاة على الميت تسليم إلا في حال التقية .

²⁷ Muhammad bin Yaakob al-Kulaini *Al-Usul Min al-Kafi* jil. 2 hal. 371

Dan diriwayatkan bahawa 'illat di dalam perkara tersebut adalah Allah ta'ala telah memfardhukan ke atas manusia lima sembahyang lalu Ia menjadikan daripada setiap sembahyang kefardhuan satu takbir kepada mayat. Sesiapa yang menyembahyangkan ke atas perempuan maka hendaklah dia berdiri dekat dadanya, dan tiada salam di dalam sembahyang ke atas mayat kecuali dalam keadaan taqiyyah.²⁸

Ini adalah salah satu contoh taqiyyah yang diajarkan oleh imam-imam mereka kepada penganut Syi'ah bila bersama bersama Ahl as-Sunnah wa al-Jamaah.

6. Pandangan Syi'ah terhadap Ahl as-Sunnah wa al-Jamaah.

Penghinaan terhadap Ahl as-Sunnah wa al-Jamaah terdapat di dalam banyak kitab Syi'ah. Di dalam artikel yang ringkas ini satu riwayat sahaja yang akan dikemukakan.

عَنِ ابْنِ أَبِي يَعْفُورٍ عَنْ أَبِي عَبْدِ
اللَّهِ (ع) قَالَ لَا تَغْتَسِلُ مِنَ الْيَدْرِ
الَّتِي تَجْتَمِعُ فِيهَا غُسَالَةُ الْحَمَامِ
فَإِنَّ فِيهَا غُسَالَةَ وَلَدِ الزَّانَا وَ
هُوَ لَا يَطْهَرُ إِلَّا سَبْعَةَ آبَاءٍ وَ

²⁸ Abu Ja'far Muhammad bin 'Ali bin Husain bin Musa bin Babawaih al-Qummi *Man La Yahdhuru al-Faqih* jil. 1 hal. 165

فِيهَا غُسَالَةَ النَّاصِبِ وَهُوَ شَرُّهُمَا
إِنَّ اللَّهَ لَمْ يَخْلُقْ خَلْقًا شَرًّا مِنْ
الْكَلْبِ وَإِنَّ النَّاصِبَ أَهْوَنُ عَلَيَّ
اللَّهِ مِنَ الْكَلْبِ

Daripada Abi Ya'fur daripada Abu Abdillah a.s. katanya: "Jangan mandi dari telaga yang berhimpun padanya air mandian dari bilik mandi kerana padanya terdapat air mandian anak zina dan ia tidak akan bersih sehingga tujuh keturunan dan padanya juga terdapat air mandian 'nasibi' dan ia adalah yang paling buruk diantara keduanya. Sesungguhnya Allah tidak menciptakan makhluk yang lebih buruk dari anjing dan sesungguhnya orang 'nasibi' adalah lebih hina di sisi Allah daripada anjing".²⁹

Nasibi adalah gelaran yang diberikan mereka kepada Ahl as-Sunnah wa al-Jamaah kerana nasibi bermakna orang yang memusuhi Ahl al-Bait di sisi Syi'ah. Orang pertama yang memusuhi Ahl al-Bait di sisi Syi'ah adalah Abu Bakar as-Siddiq r.a. serta sahabat-sahabat r.a. dan golongan seterusnya yang memusuhi Ahl al-Bait di sisi Syi'ah adalah Ahl as-Sunnah wa al-Jamaah. Ini kerana Ahl as-Sunnah wa al-Jamaah tidak mempercayai serta menganggap Ahl al-Bait sebagaimana pegangan mereka.

7. Hakikat sebenar ajaran Syi'ah.

²⁹ Muhammad bin Yaakob al-Kulaini *Al-Furu' Min al-Kafi* jil. 3 hal. 5

Kalau diperhatikan kepada ajaran Syi'ah semua ajaran mereka dihubungkan kepada imam-imam Ahl al-Bait. Persoalannya apakah benar ajaran mereka berasal dari imam-imam tersebut atau ianya hanyalah tempelan sahaja? Untuk mengetahui hakikat sebenarnya ajaran mereka marilah kita meneliti sejenak apa yang terkandung dalam kitab-kitab mereka sendiri daripada mulut imam-imam mereka sendiri.

أبوخالد الكابلي سمعت علي بن الحسين عليه السلام يقول: ان اليهود أحبوا عزيزا حتى قالوا فيه ما قالوا فلا عزيز منهم ولا هم من عزيز، وأن النصارى أحبوا عيسى حتى قالوا فيه ما قالوا، فلا عيسى منهم ولا هم من عيسى. وانا على سنة من ذلك ان قوما من شيعتنا سيحبونا حتى يقولوا فينا ما قالت اليهود في عزيز، وما قالت النصارى في عيسى بن مريم، فلاهم منا ولا نحن منهم.

Abu Khalid al-Kabuli berkata: “Aku mendengar Ali Zainul Abidin bin al-Husain a.s. berkata: “Sesungguhnya Yahudi mencintai 'Uzair sehingga mereka telah mengatakan sebagaimana yang mereka katakan terhadapnya sedangkan 'Uzair tiada hubungan dengan mereka dan mereka juga tiada hubungan dengan 'Uzair. Sesungguhnya Nasara mencintai Isa sehingga mereka telah mengatakan sebagaimana yang mereka katakan terhadapnya sedangkan Isa tiada hubungan dengan mereka dan mereka juga tiada hubungan dengan Isa. Sesungguhnya kami seperti mana mereka juga, sesungguhnya satu kaum dari kalangan Syi'ah kami mencintai kami sehingga mereka mengatakan berkenaan kami sebagaimana yang dikatakan oleh Yahudi kepada 'Uzair dan sebagaimana yang dikatakan oleh Nasara kepada Isa bin Maryam, mereka tiada hubungan dengan kami dan kami tiada hubungan dengan mereka”.³⁰

Imam Ja'far as-Sadiq yang didakwa Syi'ah sebagai imam maksum mereka yang keenam telah menjelaskan hakikat Syi'ah yang sebenar:

ما أنزل الله سبحانه آية في
المنافقين الا وهي فيمن ينتحل
التشيع

³⁰ Abu Ja'far at-Thusi *Rijal al-Kasysyi* jil. 2 hal. 120

“Tidak ada satu pun ayat yang diturunkan oleh Allah tentang golongan munafiqin melainkan kandungan ayat itu pasti ada pada orang yang mendakwa Syi’ah”.³¹

Demikianlah dengan serba ringkasnya dibentangkan aqidah-aqidah Syi’ah dari kitab-kitab muktabar mereka. Semoga keterangan-keterangan yang diberikan memberi manfa’at kepada kita semua dan semoga Allah sentiasa membimbing kita di jalan yang lurus Amin ya Rabb al-'Alamin.

³¹ Abu Ja'far at-Thusi *Rijal al-Kasysyi* jil. 2 hal. 589